



12. August 2016

UKA 2016/109

Inatsisartut suleriaasianni § 33 naapertorlugu aalajangiiffigisassatut siunnersuut manna saqqummiuppara:

Nunatsinni inuussutissanik nioqqtissiornermik inuussutissarsiortunut tunngasuni, tassani ingammik inuussutissanik avammut niuerutigineqartuni pissutsinut tunngasuni, ilinniartitaanikkut neqeroorutinik amerlanerusunik ineriartortitsinissaq pillugu Naalakkersuisut UKA 17-mut nassuiaasiornissamik peqquneqarnissaannik Inatsisartuni aalajangiiffigisassatut siunnersuut.

(Inatsisartunut ilaasortaqaq Sara Olsvig, Inuit Ataqatigiit)

Tunggavilersuut

Aalisarneq taamaalillunilu inuussutissanik avammut niuerneq ullumikkut nunatta avammut niuernerani annertunersaavoq. Piffissami sivisuumi nunatta avammut tunisaasa nalitunerulernissaat qulakkeerniarlugu, ingammik aalisakkanit tunisassianik suliarinnittarnerup annertunerulernissaa politikikkut isumaqatigiissutaavoq.

Tamanna anguniarlugu inuussutissalerinermi ilisimasani naammassisinnaasanillu annertunerusunik qulakkeerisariaqarpugut. Inuili inuussutissalerinermilu ilinniartitaanikkut periarfissat ilaatigut iluaqutigaaavut, sulili annertunerusumik iliuseqartoqartariaqarpoq. Ilinniartitaanerit amerlanerusut nunatsinni ingerlanneqarsinnaasariaqarput.

Taamattaarlu ilinniarfissatut periarfissat ilinniaqqiffissatullu periarfissat assigiinngiarnersullugillu pilerinarnersittariaqarpavut. Nunatsinni ilinniarfinni arlalinni laboratoriamik atortorissaarutinik pigisaqartoqareerpoq. Taakku atorluarnerullugit procesteknikerit ilinniartitaanerit fiskeriteknologitulluunniit ilinniartitaanerit saniasigut inuussutissanik nioqqtissiornerup tungaatigut ilnniarfissanik allanik ineriartortitsinissamut atorneqarsinnaapput.

Ilinniartitaanikkut neqeroorutit ilaat inuussutissarsiornermik ilinniartitaanermik toqqammaveqartinneqarlutik, allallu ilisimatusarnermut toqqammaveqartinneqarlutik ingerlanneqassapput, taamaalilluni nunatta nioqqtissanik inuussutissanik avammut nioqquteqarnerani immikkut ilisimasani ineriartortitsisoqarsinnaaqqullugu.

Ilinniartitaanikkullu ilinniaqqiffissatigullu periarfissat pitsaanerulernerisa aamma aalisarnermik inuussutissarsiortuni amerlanerit, ingammik nunami suliffinniittut, immikkut ilisimasaqarnerulernerat taamaalillutillu tunisassiat annertunerusumik suliarineqartalernissaasa qulakkeernissaannut piginnaasaqarluarnerulernissaat nassatarissavaa.

Nunatta aalisakkanik suliffissuini amerlasuuni suliffeqarneq imaannaangitsuuvoq. Tassani sulisut ataasiakkaat tunisassianik nunatta avammut tunisartagaasa amerlanersaannik, isertitsissutiginerpaasaanillu toqqaannartumik attuumassuteqartuupput.

Ullumikkut tunisassiorfiit ilaat aalajaatsunik sulisussarsiniapiloornertik pissutigalugu tunisassianik immikkuullarissunik piumasaqarneq naammassiniapiloorpaat. Ilaasa suliffimmik paarsiniarnermik ajornartorsiuteqartarnerat oqaluuseriinnarnagu, inuit ataasiakkaat aalisakkanik tunisassiorfinni sulisut immikkuullarissumik piginnaasariaqagaat, ullumikkullu nunatta avammut niuerutigisartagaasa annersaanni tunisassiarpassuit suliarisartagaat oqaluuserisariaqarpavut.

Aalisakkanik inussutissanillu allanik inuussutissarsiornermut tunngasunik ilinniartitaanerit ineriartortinnissaannut qunujaassuseqartariaqarpugut, inuussutissarsiummilu tassani ilinniagaqalersinnaanermut aporfiusut piarneqarnissaannik qulakkeerinnittariaqarpugut. Aalisakkanik tunisassiornermik inuussutissarsiutit saniatigut nioqqutissat inuussutissat allat aamma aallunneruneqartariaqartut isumaqarpugut.

Uumasunut nunamiut miluumasut, qeqqussat, naatitsisinnaanermut periarfissat naatitsiviillu ineriartortinneqassapput, nunatsinnilu piffinnut amerlanerusunut siaruarlugit, nioqqutissianik immikkuullarissunik nunami maani nammineq atugassatsinnik, avammullu nioqqutissatsinnik inerisaasinnaaqulluta.

Inuussutissarsiornermullu tunngasuni ilinniartitaanermik periarfissat assigiinngitsut ineriartortinneqarnerata peqatigisaanik, praktikerfissat naammattut qulakkeerneqassapput, soorluttaaq ilinniartitaanermik periarfissanut tunngasunik siunnersuinerit ineriartortinneqassasut.

Inuussutissaqarnermullu tunngasunik ilinniarsimassutsip ilinniarfissatigullu periarfissat ineriartortinneqarnerat avammut nioqquteqarnermut tunngasuni inuussutissalerinermik nersutillu nakorsaanut tunngasuni akissussaaffiup tiguneqarnissaanut tunngasuni suleriaqqinnissami toqqammavissiilluassaaq.

Aningaasaqarnikkut allaffissornikkullu kinguneqaatit

Ilinniartitaanikkut neqeroorutit nutaat amerlasuut ilinniarfiit pioresut suleqatigalugit oqaloqatigalugillu pilersinneqarsinnaanerat missingerneqarpoq. Taamaammallu suliap taassuma Naalakkersuisut tungaannit ataqatigiissarnissaanut AC-tut akissarsiallip qaammatini pingasuni akissarsiaata missaanik naleqartut atorneqarnissaat naliliutigineqarpoq, tassa 125.000 kr-it missaanni.

Namminersorlutik inuussutissarsiortunut kinguneqaatit

Inuussutissalerinermut tunngasuni siammasinnerusunik ilinniarsimasoqalerneratigut, inuussutissarsiummi tassani nunaqavissut amerlanerusut sulilersinneqarsinnaalissapput. Taamaalillunilu namminersorlutik inuussutissarsiortunut kinguneqaatit pitsaasuussapput, siunnersuutikkummi ilaatigut avammut tunisassiorturnut iluaqutissatut, sulisussat piginnaanillit amerlanerusut pissarsiarineqarsinnaalissapput.

Innuttaasunut kinguneqaatit

Inuussutissalerinermut avammullu tunisassiornermut tunngasuni ilinniartitaanikkut periarfissat amerlanerusut ineriartortinneqarnerat iluatsippat, innuttaasut ullumikkumut sanilliullugu amerlanerusunik qinigassaqaalissapput.